

Конкурс «Лучшие люди Бурятии» номинация «Улыбка фортуны»



Ганзага ниилэбэл, аза талаан наашалха...

Заха холын Захааминай аймагай түбтэ Ветерануудай байшан 199 ондо нээгдэһэн юм. Тэрэ гэхэнһээ хойшо хори гаран жэл үнгэршоо, мүнөө АУСО для ветеранов войны и труда «Горный воздух» гэхэн нэрэтэй пансионат болошонхой. Эндэ эбтэй эетэй, ажалша шударгы, хүхюүн дорюун ажалшад бэрхэ хүтэлбэрилэгшэ С.Ц. Норбоевагай ударидалга доро амжалта түгэс хүдэлжэ байдаг. Энэ пансионадай ахамад бухгалтер О.Д. Шагдулова тухай минии хөөрөөн.

Оюна Дашеевна Шагдурова 1969 ондо Захааминай аймагай Санага нютагта ажалша бэрхэ, хүн зондоо хүндэтэй Даша Раднаевич ба Валентина Раднаевна хоёрой гэр бүлэдэ зургаадахи үринь боложо мүндэлөө һэн. Бага наһанһаа

hүбэлгэн бэрхэ,хүхюү зантай, олон нүхэдтэй Оюна Санагынгаа дунда хургуули дүүргэжэ, бухгалтерай мэргэжэл шэлээ хэн. Дээрэ нэрлэгдэһэн пансионатта нээгдэхэһэнь эхилээд олон жэлэй туршада бэрхээр хүдэлжэ, Буряад республикын социальна хамгаалгын габьяата хүдэлмэрилэгшэ гэһэн үндэр нэрэ зэргэдэ 2007 ондо хүртөө хэн.

2014 оной апрелин 11-12-до «Титан» бүлгэмэй үнгэргэдэг заншалта болоһон арбадахи «Байкальская рыбалка-2014» гэһэн конкурсно хабаадахаа пансионатай ажалшад хоёр команда бэлдэбэ.Эрэшүүлэйнь команда «Горный воздух» нэрэтэйгээр, эхэнэрнүүдэй- «Телепузики». Эхэнэрнүүдэй командын бүридэлдэ Бэлигма,Вандана, Оюна ба.... Гээд оробод. «Телепузики» бүлэгэй удамаршань Оюна Дашеевна болоо хэн. Хэдэн үдэрэй туршада хубсаһа хунараа(экипировка), загаһа бариха хэрэгсэлнүүдээ бэлдэбэд.

Хүтэлбэрилэгшэнь С.Ц. Норбоева бэлэдхэл ехэтэй хоёр бүлэг загаһашадаа «Хайс» автобустоо хуулгажа, «Илахамнай лабтай!» гэһэн уряа доро Байгал далай тээшэ шуумайгаад бэлэй.

Загаһа бариха дуратайшуул олоороо сугларанхай, мүн һонирхоһоншье зон олон байба. Хамта 268 хуури бэлдэгдэһэн байгаа. Жребий таталган боложо, хайн хуурида хүртэхэ һанаатай байһаниинь аяар 264-дэхи хуури тудаб. Ямаршье холо хуури татаба гээшэбибди гэжэ нэгэ бага голхорбошье , үгтэһэн 5 саг соогоо загаһаа барижал мэдэбэд. «Багашье,томошье загаһан баригда»,- гэжэ шэбшэжэ хуугаад хилмаадабад.

Хэдышье саг соо хуугаа юм бү мэдэе, нэгэнэйнь хилмаада загаһан аһалдаба хэбэртэй.Загаһашан тэрээнээ аалиханаар шэрэжэ мүльһэн дээрэ гаргаба. Түрүүшын загаһанда багаханшье һаань, булта аргагүй ехээр баярлабад. Үгтэһэн сагай үшөө дүүрээдүй дээрэһээ загаһашалгаа саашань үргэлжэлүүлбэд. Хүлээхэ, хүсэхэ хоёрһоо бэрхэ юумэн үгы гэдэгтэл хуужал хуунад. Саг ябажал байна. Гэнтэ Оюнын ургань хүдэлхэдэл гээд нэгэ хүндэшэг юумэн хилмаадань тороходол гэбэ. Оюнын зүрхэн шангаар сохилжо, алтан үндэгэ абажа байһандал дүмүүхэнээр ургаяа татаба. Одоошье үни хүлээгдэһэн загаһан мүнгэн хашарһаяа ялалзуулһаар мүльһэн дээрэ гарашаба. Энэ үдэр эдэ дүрбэнэй эгээн азатайнь Оюна байшаба бшуу. Түрүүшын загаһа баһал Оюна баряа. Хүхихын ехээр хүхилдэбэд. Энэ үдэр үгтэһэн саг дүүрэжэ, «Телепузики» команда хоёр загаһаа комиссиин гэшүүдтэ абаашажа шэгнүүлһэниинь 330 грамм дараба.

Үглөөдэринь, апрелийн 12-до, заншалта болоһон «Байкальская рыбалка-2014» гэхэн арбадахи юбилейнэ конкурсын дүн ба шагналга болобо. Худалдаа наймаанай «Титан» бүлгэмэй генеральна директор В. Бредний амаршалгын үгэнүүдые хэлэбэ. Шагнахаяа ба амаршалхаяа тайзан дээрэ Россидо суутай болоһон киногой одон- Финлянди гүрэнэй хүбүүн- Вилле Хаапасало гараба.

Конкурсын дүнгөөр эхэнэрнүүдэй команданууд сооһоо АУСО «Горный воздух» пансионадай «Телепузики» команда түрүүшын һуури эзэлбэ гэжэ соносхобо. Командын удамарша Оюна Дашеевна Шагдунова тайзан дээрэ гаража, 1-дэхи шатын диплом, кубок болон дүрбэн сертификат туд тудтаа гуша гушан мянганай- Таиланд гүрэн ошожо амарха путёвко «Титан» бүлгэмэй зүгһөө Вилле Хаапасалын гарһаа абаба.

Одоол аза талаан гээшэ энэ бэшэ гүгэжэ һанахаар лэ. Хадата Захааминай дүрбэн бэрхэ басагадай ганзага ниилэжэ, энэ ехэ хэмжээнэй конкурсын илагшад боложо тодороо ха юм. Нэгэниинь бултанайнгаа түлөө, булта нэгэнэйнгээ түлөө гэдэгтэл Оюнын аза бултандаа хүртэбэ гээшэл даа.